

濰縣文獻叢刊

第三輯

第三輯

濰縣文獻叢刊

白浪河上集

濰縣竹枝詞

宏福寺碑考

白浪河上集

中華紀元廿五年七月
均生署端



河上集序

歲壬午癸未匈奴大入犯破薊州破河間破臨清兗州山東下者六十餘城萊
邑陷先君子抗節死焉孤既號泣嚙血上書聞之天子迺東奔繇京師達家凡
二千里其間城郭頽蕩人民殺戮幾無餘惟濰攻三月守愈堅屢挫賊鋒甚壯
烈也是時濰始撤守大令周元亮氏方具牛酒饗士聞余至疾趣爲設木主哭
之余固沈痛不能理顧元亮亦以負創抱疴嗟呼古今治亂多矣身在行伍手
披荆榛豈曰無人卒未聞以拒敵之力當汗馬之勳如吾友者此白狼河上之
詩諸卿大夫士所繇作也自虜長驅青齊烽火梗塞無人煙父老子弟四方散
者咸有不畏胡奴但畏官軍之謠貽斯禍者誰哉忠臣烈士枕戈飲恨讀是什
也能不悲乎且以余今日所遭觀廬井而長泣臨州邑以永歎茲以兄蒙難奉
母詣闕門乞貸再經濰母荷草巾席地坐車下指顧流涕久之謂萊之陷若翁
死社稷當無恨我與若弟妹不獲以咫尺托斯城者豈皆天之爲與然猶不知
爲子之友元亮氏所全也余益愴心而痛矣夫禍亂及於心腹而主上殷憂謠
諺聞於四方而人心疑散天下大勢尙未爲卽安也元亮負絕世才戡亂定猷
功成勒銘獻誠作頌豈惟北海一城哉余故泣然而爲之序以志同仇云爾同

序白狼河上集

予讀王子大允馬子西垣所訂白狼河上集不禁泣然而泣下也草茅微賤之士一旦受上殊恩致身通顯此其報稱之艱未但僅食人食憂人事而止自奴寇交訐聖天子日夕焦勞思得奇才異能之士勝任而愉快乃十餘年來上之恩禮日以加而求禦虜而虜不入盪寇而寇不深者卒未有其人士生此際方且慚愧欲死措躬無地若但保尺寸土便搖脣鼓舌詡詡然思以億萬人性命爲一己進身地倒行逆施若此又安望其進而奏戡定之略哉唐陸贄之論定難功臣曰難則當之定將安據勞或有矣功其謂何事雖未可同日語然予嘗讀其言而旨之濫之役一垣而外爲虜所塗毒者實從來所未有予方自懼上負吾君下負吾友乃聖天子不加譴責實屬厚幸而諸君子又從而獎藉焉賡和焉兩君子又從而壽之梓嗟夫濫陽之民何不幸而值予予又何不幸而至聞此聲也若夫義激于衷詞形于外行墨之間實足鼓一時暮氣而使之旦則諸君子之言又何可忽哉于其成也爰書數語歸之癸未仲夏濫令大梁更生周亮工書

濰縣和記

印刷局印

白狼河上集 濰陽虜退集詠

濰陽王 洵大允 輯

大澤 馬士奇西垣 訂

讀元亮明府枕上詩

膠州高弘圖 少司馬

解却芙蓉搗采毫新詩字字夏雲璫明堂欲計三年最大史親書百戰勞慰帖
山河稱續命煎調參朮爲分膏長沙功業柴桑韻細認圖章是學陶

讀元亮明府城上諸作有感

高弘圖

曾是開樽地笳聲亂鼓聲昔賢懷赤白此際視黔黎勝律吹堪聽成功勒足題
鹿臺經雨後新草慰萋萋

虜退志感用周元亮生字韻

福清郭文祥 膠州守

九鎮不乏兵胡兒敢爾橫未聞精露戰空自避風聲雨淚千家泣孤城三月怵
重圍今亦解何擬共更生

郊望步元亮韻

郭文祥

危堞曾無恙傷心轉自吁麥青餘踐踏骨白慘荒蕪哀徹盡嗷雁憂深欲蓄荼
何人雪國恥長組繫驕胡

用磴齋末句韻頌元亮明府保濰功

益都房可壯都憲

細認圖章是學陶未聞蓬澤試龍韜三年露浥甘棠芾百日塵飛胡騎臊橫槩
無忘裁楚賦同仇何用共秦袍君親並慰頻呼酒轉覺柴桑興不豪

守濰殲虜

安丘王琇郡丞

烽煙三月黯濰波萬竈驩騰快枕戈殲虜雖緣得地利全城却的是人和青萍
劍漬奴頭血白浪河驚壯士歌卓爾奇功達帝座燕然應勒遠山阿

濰邑全城殲虜

安丘張繼倫明經

十千驍騎窺孤城賢牧胸中富甲兵糾策何難鞭狡虜揮戈宜欲掃欃槍同舟
漢女爭投石破胆胡兒夜徙營饒立奇勳酬聖主書傳海內盡知名

虜攻濰三北越三月聞奴出塞

大梁閔派魯茂才

胡馬渡陰山王師薄伐艱陣雲青海障弓月白河彎奴力三攻竭民心百戰嫺
何天驕此孽生出玉門關

讀元亮詩有賦并序

予病沈痼不起而值奴騎縱橫思卽病死其誰知者此造物界予方便死
所耳旣奴逼城下予笑謂友人曰打破賊奴也只用得箇蒲團工夫蓋兵

猶禪也然昔人謂賦詩不足退虜夫退虜非詩也若戈戟叢中不廢吟詠
非氣足以勝而十分整暇不能是詩亦禪也讀元亮詩羨其有此爲賦一
律

澹

張爾忠

大中丞

病體支離一棄灰藏身無用海山隈笑譚陣上等閒事烽火傳來何浪催中土
着鞭須有定左賢已繫猶驚猜多君詩牘戰酣氣舌出電光唾欲雷

時城上城下多殪奴魁道路盛傳遂來部檄察其姓名

虜退奉懷周夫子

霑化

李呈祥

孝廉

武事與文事吾師獨此心虜氛突紕結衆志聚高深血戰酬天地奇功慰古今
遙知髮欲白猶自詠雲岑

讀元亮明府通愷集

澹

胡振奇

主政

艱難百戰造孤灘檄草揮成旋灑詩西邏穹廬去穩東循斥野悼耕遲傷荼
非爲身創苦急藥如兼民殍醫愷氣欲通須博濟柴桑菊莫縈思

膠西高司空以虜退志感詩見示次韻寄答

胡振奇

千載燕然何處尋凋殘滿目苦登臨擊奴不盡材官略濟世惟憑元老心望斷

荒蕪迷曲徑聲吹哀咽隔長林於今胡馬北風去撫劍慚非忠聖鐔

虜後堂自白門過灘省舅氏元亮下榻陶菴笑談契闊越數十晨夕絕口
不道及城守事坦曠閒靜其意去彭澤幾許比讀河上集見高司馬句愛
其風雅宛篤大爲吾舅寫炤而房都憲詩卽用其結句爲起句意味淵然
居然進吾舅於陶矣卽又以房之結語爲起續成一詩以視高房兩先生
諸什何啻星之於月也

金谿唐堂武解元

轉覺柴桑興不豪琴箏五典幾人操詩裁楯上能通儘菊種菴前但學陶彭澤
依然三徑綠匡廬無恙五峯高文章旣以公天下莫問齊城戰伐勞

白水四章章十句

哭陣亡諸將士也城上下凡數十戰將士死者二百餘人得其姓氏者九
十餘人邑人譚以丹爲此哭之

灘譚以丹茂才

白水之浦石城惟許蠡爾奴夷環彼輶櫓明明周侯允文允武授兵登陣萬姓
駢堵選士衝鋒桓桓貔虎

白水之垠流風惟馴墉頭暝下荷戈持殳衆以衛主子懼失親拚命莫贖九十
餘人百千億載燁燁其神

白水之踵山原糾拱如彼維邱纍纍丘壠俟曰吁哉天殲我勇同澤孰歌曲距孰誦咸殞無殤以愧青冢

白水漻漻英魂飄飄四方六合孰結爾寮侯曰吁哉楚些可招酌以玉醴醺以雲韶魂乎歸徠舒我懷恻

周夫子全城爲東省冠喜賦

霑化 羅載惇 茂才

驚看千里蔽黃雲笑應重圍虜自氛霜戟芒寒明壯志風旗影曳建奇勳他年輔國調梅手今日安邦細柳軍直斬樓蘭獻聖主山河十二許誰羣

和周夫子韻

霑化 蘇毓眉 茂才

一城全匪易亂定倍咨吁煙燼埋荒草血痕長綠蕪民惟永夏日政自遠秋荼回首重圍處誰能獨拒胡

枕上

蘇毓眉

鼓角聲繁灘水濱戰雲漠漠俯城堙裏瘡揮羽全斯土飲血登陴誓此身暮聽悲笳吹落日曉看胡馬遁飛塵功高八陣雄千古猶是當年諸葛巾

和元亮明府箭口復發之作

霑化 王 璘 孝廉

播鼓山前劍影繁指揮到處是長關衆人慈母同仇切半載將軍戰甲殘國爾

忘家心已碎生從濱死臂留癰淋漓洒血詞如玉名士風流滿綉鞍

踏沙河千憶刺血請兵事

濰 劉秉錫 茂才

濯斯坊外卽滄浪石磴參差度板梁觸目淒君衣帶雨臨流炤我鬢吹霜行思
百日支胡帳坐話千年立漢疆驛路關山飛血檄不知何處是漁陽

虜退返東郭舊居用周夫子韻

濰 譚國禎 茂才

舊舍百年營蕭然四壁更鼠驕穴在戶蛛橫網爲城幸我柴桑叟復吾樛櫟生
優游可卒歲不必豔朝纓

閱河上集不勝同病之痛而高司馬所賡酬枕上詩尤令人一唱三歎益以
房都憲及唐忠廉連環諸吟同入三昧矣路次效顰偶成俚語歸以示家
兄擊節諸公之什亦漫擬續貂并錄呈博粲

福清 郭文祥 膠州守

莫問齊城戰伐勞甲兵十萬富文韜吞胡憤切看纓組報國身輕等羽毛一任
巧攻隨帶解甯論隆貺有弓橐于今蛇豕詎惟虜我輩聞雞夢欲翱

福清 郭文寬 茂才

我輩聞雞夢欲翱究推元會幾周遭因思湯日山爲赭尤憶堯年水亦滔漠北
遑龍生艸霧江南雄虺鼓炎飈如將反手安坤軸運甕何妨且學陶

高司馬芙蓉采毫一語詞簡意盡可括全城通儘二刻閩中郭夫子岷玉各
爲連環諸吟丹復僭爲轉合仍歸于芙蓉采毫之句俾六詩如環無端焉

濰
譚以丹 茂才

運甕何妨且學陶鼎垣宰割待牛刀柳存五蔭參差立槐布三階取次高岱岳
霖行霑率土海邦波晏服窮毛喈喈鳳韻賡阿上解却芙蓉擲采毫

過濰聞父老談全城績有贈

溧陽人
原名獻 宋 劼 愈憲

吾慕天下士於君乃悟真全城窺稍略衛世蘊通神兵甲徵儒効旌旄愧帥臣
中興明聖業展也佐維新

其二元亮師友吾友林宗太冲子襄諸公故云

名流擅文虎聖世表人龍管葛源師友申陳謝顧宗所欣交臂乍終快執鞭從
晚節成蛇足何途掖我慵

奉和元亮明府楯上韻

濰王 璿 大參

羯鼓翻催柳杏凋春風噓拂澹忘驕城頭露布朝磨楯枕上新詩夜和鏤四履
侯藩依我固廿年王愼向今消洋洋大烈堪銘石所愧微吟匪姒姚

奉和元亮明府韻

濰王調鼎 銓諫

百尺重關下羽書天驕胡運竟何如無衣空自歌同汝有勇誰言欲買余挽戟
陣前揮魯日臨風城上賦凌虛奠安惟有神明宰不恃河山最勝餘

其二

黑雲覆地戰聲繁三鼓猶盈氣未闌插帳高原曉角急連烽窮海野燒殘寒侵
重甲層霜影血送飛函點箭瘢應是鳳池簪筆手新詩裁得在征鞍

其三

幾道腥風出穹廬同仇插血戟牲書市人樂戰傾囊後壯士長歌彈鋏餘天限
金湯新作壘霜吹匕首舊名徐破奴三捷南歸日得共披萊尋故居

其四

長算帷幄妙縱擒却胡敢謂匪斯今郊原半失桑麻色烽火難迷天地心寂寂
青燐悲獨切嗷嗷鴻雁力難禁策勳佇看花磚影併譜流民待玉音

次周夫子過昌邑韻

濰王潤茂才

蕭蕭殘邑路驅馬欲黃昏血化晉臣碧髮憐楚季髡陰風生鬼火殘月炤孤魂
荊棘郊原滿撫時空若捫

次見耕者

王潤

虜飽飛颺去憂勤事耦耕城頭夕日返隴上夏雲生
燕野龍嘗戰新田犢易兵
斂襟讀勝律清氣引澄泓

元亮明府衙齋陶菴成

萊畢拱辰 大參

纍纍者服官縛脫乃徵養以官爲性命簿領翻豎網以官爲郵傳斗室萬間廣
周君金門英展驥平壽長束帶之餘暇小築寄偃仰五柳扳腰人胡以額其勝
頗似湯鑊場忽作清冷想隱見若殊途高逸合相倣北窗隘羲皇漉酒恍抵掌
煙雪寫枯桐遠韻自孤往飛花閒訟庭拄笏嘯朝爽魯國有人龍在昔蒞茲壤
絳頭走戟時談笑撐板蕩客滿樽不空豪舉縱心賞憂樂隆替關古人豈絕響
幾楹彭澤庵千秋甘棠港

過灘讀碑碣頌元亮使君

南海關捷先

萊陽令尹

橫槊風流富甲兵白狼河上表千城書生破敵羞投筆士女乘墉誓請纓誰信
賦詩驅突豕更看清嘯淨長鯨醇醪意氣馮君醉不願封侯願識荆

讀硯齋先生詩末句爲之叫絕海客先生竟用爲起句益覺快甚仍用前句

各步一首

嘉定何平

高密令尹

細認圖章是學陶誰云松菊少龍韜當年偶涉東籬趣今日翻驅北鄙臊楯上

血書曾草檄邑中佳話有遺袍葛巾堪漉新醪熟彭澤濰陽稱二豪

其二

筆掃胡氛輕若毫白狼河畔響嘈噉千軍奏凱初通儘百戰登陣豈憚勞明主
尙憂農失歲孤臣敢負血成膏從今大業濰陽任未許柴桑僅學陶

戰城頭

濰 陳調元 孝廉

妖星爍爍蝕太白飛入女虛鬪光赤蓬水萊山晝氣昏青氛十丈連白霓胡馬
千羣捲地來踏盡東南之半壁山左六十餘城無堅陣官兵百萬不敢一矢遺
兒女床頭掛羽箭野老屋上看旌旗丘陵堆白骨血水漂野泥一派瘡窠沸濰
水四面邊聲連角起長煙落日閉孤城城中釜魚泣欲死城頭周郎富甲兵公
瑾威略震赤壁亞夫新屯細柳營刺血羽書夜告急死戰戎衣誌姓名城上城
下三十戰戰聲呼若吼掣劍飛如電初攻東北猛如虎力鑿五丁開山斧次攻
西北轟若雷百雉崩裂泰山摧環豎雲梯一百丈蟻屯蜂擁凌空上義士誓飲
血矢石短兵接一戰擒月支再戰梟却薛馬上露布飛一月奏三捷嗟乎嗟乎
濰城纔斗大以一丸泥封羊犬連深入大創未一經誰似此狼奔豕突怛悻而
魂驚君不見管敬仲每于內政寄軍令守則同固戰同疆三萬子弟天下橫又